



Obaveza priznavanja Božijih blagodati i izbjegavanja iskušenja (Meka)

Hatib: dr. Abdullah ibn Avad el-Džuheni

20. džumadel-uhra 1444. po Hidžri / 13. januar 2023.

Hvala Allahu, Plemenitom, Darežljivom, Koji je stvorio čovjeka od kapi sjemena, i dao mu sluh, vid i razum, i Koji s neba spušta blagodarnu kišu i njome oživljava mrtve predjele, i izvodi iz zemlje raznovrsno bilje, kao opskrbu Svojim robovima. Hvalimo Ga onako kako Ga hvale Njegovi pokorni i pobožni robovi, oslanjamo se na Njega onako kako se oslanjaju Njegovi ponizni i skromni robovi. Svjedočim da nema boga osim Allaha, Koji u zabludi ostavlja koga hoće i upućuje koga hoće, i Koji je uzvišen od toga da ima slične i ortake, i Koji čini ono što hoće, i u Čijoj se vlasti ne dešava osim ono što On želi, i svjedočim da je naš prvak Muhammed, sallallahu alejhi ve sellem, Njegov rob i poslanik, predvodnik prvih i potonjih, iz gradova i sela, Allahu moj, smiluj se, spasi i blagoslovi ga, a naše salavate na njega učini našom najboljom opskrbom, sve dok glasnik bude pozivao na donošenje salavata na njega, i sve dok ga budu spominjali oni koji ga spominju, do Dana međusobnog dozivanja. Oporučujem sebi i vama bogobožnost, da budemo iskreni u svojim djelima, da budemo svjesni Njegovog nadzora u svim situacijama, da Mu se približavamo onim čime je On zadovoljan i klonimo se onoga što izaziva Njegovu srdžbu i Njegovih zabrana. Vjerodostojnim putem potvrđeno je da je naš Vjerovjesnik, sallallahu alejhi ve sellem, rekao: "Razborit je onaj ko obračunava svoju dušu i radi za život poslije smrti, a nemoćan i slab je onaj ko slijedi prohtjeve svoje duše i nada se dobru od Allaha."

Poštovani vjernici, u ovim danima uživamo u mnogobrojnim blagodatima: nebo iznad nas spustilo je kišu, naše drveće dalo je plodove, naša zemlja je zazelenjela, Onaj Koji obilno opskrbljuje otvorio nam je vrata nebesa i Svojom blagodarnom kišom natopio cijelu našu zemlju, od koje su se napunile brane, doline i bunarevi,





napojila zemlja i drveće. Gospodaru naš, povećaj nam iz Svoje dobrote i milosti, niko osim Tebe to nije u stanju učiniti, slavljen i hvaljen neka si, Gospodaru naš, neka bude kiša milosti, a ne kiša kazne, uništenja i potopa.

O muslimani, dunjaluk je kuća iskušenja i ispita, a pametan je onaj ko čuva svoju dušu i vjeru kako ne bi zapao u smutnju i koji se spasi od nje kada mu se desi. Najobmanjeniji je onaj koga je obmanuo dunjaluk i njegovi prolazni užici, pa im je dao prednost nad ahiretom i zadovoljan je njima. Ko se bude držao Allahovog užeta, vodio se Allahovim svjetlom i čvrsto se držao Allahove Knjige, bit će na Pravom putu i spasit će se, a ko zanemari uzroke spasa, i zatvori oči pred svjetlom i skrene sa Pravog puta, zalutat će i doživjet će propast, da nas Allah sačuva.

O vjernici, na ovom dunjaluku čovjek pliva u moru života, između valova opsesija, misli, došaptavanja, sumnji, hirova, želja i oluje različitih uzroka i potreba. Onaj Koji je stvorio čovjeka, i Koji je stvorio njegove misli, želje i nagone, i Koji je stvorio uzroke i sve što ga okružuje, nije zanemario čovjeka i nije ga prepustio samom sebi, nego mu je dao razum i sposobnost razlučivanja, poslao mu je poslanike, spustio mu je program koji će ga voditi u životu na ovom svijetu i trasirao mu je put koji će ga voditi do obale spasa. Taj program je veza koju nije moguće prekinuti, on je poput lađe na uzburkanom moru, koju podižu i spuštaju valovi, a vjetrovi okreću čas desno, čas lijevo, i potreban joj je neko ko će je dovesti do cilja i odrediti joj pravac, i potreban joj je vješt kormilar koji zna puteve koji će ga voditi u pravom smjeru, jer ako nema sve to, zalutat će i utopiti se.

Iz ovog primjera saznajemo o podvojenosti i razlikama, suprotnostima u ovom vremenu, kako se znanje povećavalo i neznanje se širilo, bogatstvo se povećavalo, ali i siromaštvo, medicina se razvijala, a bolesti su se širile, nauka je napredovala u teorijama, industrijama i filozofijama, ali neznanje o čovjekovoj dužnosti i misiji u ovom životu se povećalo, pa je znanje ostalo bez pobožnosti, i bez vodilje i upute, nauke su iskorištene za ono za šta nisu stvorene, a stvorene su da budu dokaz moći i jednoće njihovog Stvoritelja, i da budu veza između čovjeka i njegovog Stvoritelja, stvorene su da pomognu čovjeku da se pokori svome Gospodaru, ali nauka je sada





daleko od ovoga, osim onoga kome se Allah smilovao; neke nauke iskorištene su za sabotazu, uništavanje i odvrćanje od Allahove vjere, i porobljavanje slabih, a razlog tome je odvajanje nauke od vjere, pa koliko će to neznanje trajati?

Ekonomija se razvila i novac se umnožio, pa se u dušama povećala sebičnost, škrtost i pohlepa za gomilanjem novca, na dozvoljen i nedozvoljen način, s pravom i bez prava, poput onoga koji pije morsku vodu, što više pije, to je više žedan. Neki ljudi potroše stotine hiljada na turističko putovanje, ali ne solidarišu se sa siromašnima i ne saosjećaju sa siročetom. Razlog tome je nepoznavanje islamskog sistema i nepoznavanje dobrote.

Najizraženija podvojenost u našim životima je podvojenost u primjeni vjerskih principa: znamo šta je dobro, ali radimo samo ono što želimo, i znamo šta je zlo, a ostavljamo samo ono što želimo, znamo šta je Pravi put, ali ne slijedimo ga u potpunosti, znamo šta je zabluda, a ne izbjegavamo je u potpunosti, oslanjajući se na Allahovu milost i oprost, kao da uopće ne čitamo Kur'an ili ga čitamo selektivno, pa tako znamo "da Allahova milost obuhvata sve", ali ne znamo da se u istom ajetu, koji govori o veličini Allahove milosti, spominju oni koji su je dostojni i koji je zaslužuju: "dat ću je onima koji se budu grijeha klonili i zekat davali, i onima koji u dokaze Naše budu vjerovali" (El-A'raf, 156). Boj se Allaha, ummete islama: "Vi ste narod najbolji od svih koji se ikada pojavio: tražite da se čine dobra djela, a od nevaljalih odvrćate, i u Allaha vjerujete" (Ali Imran, 110); "tako smo od vas stvorili pravednu zajednicu da budete svjedoci protiv ostalih ljudi, i da poslanik bude protiv vas svjedok" (El-Bekara, 143).

Znajte da se imanom, vjerovanjem, otvaraju vrata bereketa, blagoslova, s neba i iz zemlje, a grijешenjem, nasiljem i nepravdom otvaraju vrata svakog zla, kao iskušenje i približavanje kazni, i zato je obaveza ummeta da se čuva od grijeha, bude svjestan Allahovih blagodati i zahvaljuje na njima i da ga ne obmane to što je Allah, džellešānuhu, nevjernicima otvorio vrata dunjalučkih dobara. Znajte da je ponos i počast u pokornosti Allahu, a da je poniženje u grijешenju. Zadovoljite se onim što vam je Allah dozvolio, a ostavite ono što vam je zabranio, i budite ubijeđeni da su





smrtni rokovi i upravljanje stvarima u Allahovim rukama, tako da niko ne zna šta će mu se desiti ujutro ili uvečer. Budite oprezni, obračunavajte svoje duše prije nego što budete račun polagali, i izvagajte svoja djela prije nego što budu vagana.

Donosite što više salavata i selama na našeg plemenitog Vjerovjesnika, to vam je naredba od vašeg Gospodara u plemenitoj Knjizi. Uzvišeni kaže: "Allah i meleki Njegovi blagosiljaju Vjerovjesnika. O vjernici, blagosiljajte ga i vi i šaljite mu pozdrav!" (El-Ahzab, 56)

Molim Allaha da i meni i vama podari blagoslov u časnom Kur'anu, i da podari da na koriste njegovi ajeti i mudra opomena. Rekoh ovo i od Uzvišenog Allaha tražim oprost za sebe, za vas i sve muslimane od svakog grijeha, a tražite i vi, On mnogo prašta i On je milostiv.

